



考覈錢局員外米世法疏

題爲考核司屬官員事專理新餉山東清吏司案
呈奉本部送據廣西清吏司員外郎米世發呈
前事內稱竊照寶泉局開設鼓鑄專爲薊密等
處邊餉其最急者尤供進

上制錢之用每歲銅本止十五萬兩南部銅差郎中
一員發商採買本職止待銅鉛解到收發鼓鑄
但局中匠役龐雜事體瑣冗控馭之甚難清查
之亦不易本職晨入晚出嚴搜索謹收放汰冗

役杜弊孔雖一毫莫假卽一文必報如樽節渣
末補輕等錢一一呈堂具奏且客歲虜薄
都城承劄委管

德勝安定兩門援兵行糧彼時道路梗塞銅缺停
爐職又令爐頭收買襍銅湊用庫貯貴銅委曲
接濟俾京軍鹽菜等錢運草運米腳價不至缺
乏縱不敢言勞亦備極拮据矣計職差原係一

年自崇禎元年十二月二十九日起扣至崇禎
二年十一月二十九日已經差滿蒙本部堂以
軍興旁午部員偶缺題留再任職屢稟控辭前
於九月十四日蒙本堂康新民

奏繳奉

聖旨憐職久苦准與更替業於九月二十四日與山
東司主事王珍錫交代訖歷任一年十箇月共
計獲息四萬五百五兩三錢三釐二毫本利分
毫不差業經分別管收除在造冊呈報本部堂
並交盤王主事外理合具呈以備考覈等因到
部奉批該司查明考覈具題奉此除查明外相

應題叙案呈到部該臣等考得管理寶泉局廣西司員外郎米世發操持瑩潔器識精沉本籌邊裕

國之心理園府生財之道勤省試飭釐剔而匠役無得侵漁權子毋經樽節而錙銖悉歸

公帑任事一年十箇月獲息四萬五百金勞績居多補裨匪細况且去冬虜薄城下曾委坐

德勝安定二門監放援兵行糧支應京軍塩菜運價等錢東西兼顧朝夕拮据又備極艱辛而不辭若本官可謂克共厥職無負任使者矣今旣差竣更替相應紀錄以備擢用恭候

命下臣部准令本官回部管事仍咨吏部紀錄施行

崇禎三年十月十九日具

題本月二十二日奉

聖旨米世發准與紀錄該部知道欽此

題覆薊鎮八月奏報餉冊營制互異疏

題為薊鎮營制互異支餉溷淆請乞

勅下督撫諸臣酌時定制以杜虛冒以昭經久事專
理新舊兩餉司案呈奉本部送據薊州餉司蔣
範化呈送放過八月分新舊餉錢糧主客防援
官兵馬騾數目簡明文冊內開舊餉主客官兵
共一萬七千七百九員名共該支廩糧銀二萬
一千四百兩三錢五分九釐七毫九絲五忽內
已支官軍一萬六千七百二十一員名支過廩

糧銀二萬三百一十六兩五錢一分四釐五毫
七絲本色米一千四百一十七石七斗七升又
除正支外補支一月官軍一千二百九十八員
名支過廩糧銀一千六百六兩八錢七分八釐
二毫五絲未支官軍九百八十八員名該廩糧
銀一千八十三兩八錢四分五釐二毫二絲五
忽俟九月內餉銀到日補給馬騾一千七百九
十四匹頭共該支乾銀一千一百八十一兩九
錢一分四絲內已支馬騾一千七百四十二匹

頭支過乾銀一千一百三十六兩七錢四釐一
毫本色豆二百一十四石六斗草五千六百五
十五束又除正支外補支一月馬騾九百一十
九匹支過乾銀七百八十五兩七錢一分四釐
未支馬五十二匹該乾銀四十五兩二錢五釐
九毫四絲俟九月內餉到補給衛所官軍舊例
按季支領近因壓欠不齊今八月內應支夏季
官軍一千七百五十七員名每月該支銀五百
九兩一分九釐五毫一季應支銀一千五百二

十七兩五分八釐五毫內已支官軍一千二十
一員名支過夏季俸糧銀八百六十九兩八錢
八分五釐四毫五絲米一千五百二十一石五
斗二升又補支春季官軍一百三員名支過俸
糧銀一百八十四兩九錢九分四釐四毫五絲
米二百五十一石又補支開俸官一員自天啓
六年六月起至崇禎二年五月止支過俸銀六
十二兩四釐米二十石未支官軍七百三十六
員名該俸銀六百五十七兩一錢七分三釐五

絲俟九月內餉到補給新餉官兵二萬七千三
百九十四員名共該支廩糧銀共四萬一千七
百三十一兩二錢五釐九毫四絲一忽五微內
已支官軍二萬五千二百七員名支過廩糧銀
三萬三千九百一十七兩八錢四分六毫一絲
九忽五微支米六十石三斗又防守寶坻縣官
兵除正支一月外補支二月每月官兵六百一
十名兩月共支過廩糧銀一千七百六十七兩
二錢三分六釐八毫又榆木嶺除正支一月外

補支一月兵丁一百五名支過糧銀一百五十
三兩八錢九分三釐二絲二忽未支官兵一千
四百七十一員名該廩糧銀五千八百九十二
兩二錢三分五釐五毫俟九月內餉到補給馬
騾一千六百八十八匹頭共該支乾銀一千三
百六十一兩九錢一分三釐五毫內本色豆一
百七十四石五斗七升本色草五千一百四十
四束內已支馬騾一千六百四十八匹頭支過
乾銀一千三百二十六兩七錢六分三釐五毫

本色豆一百六十四石六斗七升本色草四千
八百一十四束未支馬四十四匹該乾銀三十五
兩一錢五分俟九月內餉到補給各鎮應援官
兵四萬五千二十三員名共支過鹽菜并粳粟
米折色銀四萬四千七百五十五兩九錢七分
六釐七毫五絲本色粟米七千八百八十八石
二斗一升五合馬騾一萬六千五百三十八匹
頭共支過豆草折色銀一萬七千二百一十三
兩二分七釐五毫本色豆四千三十二石七斗

八升五合本色草一萬六千一百七十束以上
除本色外共放過銀一十二萬四千九十七兩
四錢三分三釐一絲一忽五微尚有八月候領
未支主客兵月餉銀七千七百一十三兩零援
兵鹽菜等銀一萬二千兩零俱候九月餉銀到
日補放造冊到部又該總督兵部尚書張鳳翼
造送薊鎮各官兵支冊到部俱批新舊二餉司
查筭明確具題隨該二司將餉冊兵冊逐一磨
對內多數目參差營制互異相應具題案呈到
部該臣等看得自奴難以後近畿各鎮兵馬多
不如額而新舊混淆茫無確數惟薊鎮爲最臣
部移會守催不啻再四惟求得其清冊毫無舛
錯者據實入

告以少圖節省於萬一今據餉司蔣範化造報八月
分餉冊及准總督張鳳翼咨送兵冊前來該臣
率同司屬逐一磨對除各鎮應援官兵四萬五
千二十三員名馬騾一萬六千五百三十八匹
頭各支本折糧餉草料不開外先將舊餉新餉

官兵分別款目查原食舊餉者曰主客兵曰臺兵原食新餉者曰新兵近又有新募兵丁其主客兵則有三屯左右中三營遵化左右二營撫院另立標下親丁營以統之在各路有喜峯太平馬棚松棚四營而四路諸口又各設有守提等營以副之又灤陽營設居三屯之外而分守各臺者復有中路南兵營按以元年題定原額主客官軍共二萬七千八百七十六名而今之食餉者止一萬七千七百九員名其原額新兵則有援兵宣武二營東西遊兵二營道丁山西民兵二營奉

旨新募兵丁則有軍門勝兵左右二營寶坻親丁營駐防擦崖榆嶺等營按以元年題定原額新兵共一萬四千五十五員名而今之食餉者有二萬七千三百九十四員名是督臣所報新舊官將軍兵二項較之前撫題定之數多寡已自參差不同雖曰此有所增彼有所減庶幾不虧原額惟是舊者既附食於新新者復影射於舊參

對支餉文冊抑何營伍之溷淆而新舊無定規也謹就其不同者臚列言之如遵化左右二營原隸舊兵項下今雖依然舊兵之伍皆已羨厚餼而改食新餉矣如撫院新丁薊州道丁旣以健勇而食新餉者十分之九而猶有零星百餘名仍列於舊冊者何也且又有錯出於不新不舊之間如寬佃黃崖等營月支銀九錢四分并兼布花見隸新兵項下又不知何等規則矣同一三屯新兵也多立各自有義兵營團練營左翼右翼比家丁新兵等營同一撫院標下親兵也因地設防如招撫營寶坻營貼防潘家口等營伍瑣碎層出疊見令人莫可稽查矣至諮贊周夢尹撤矣而官役支糧者猶有一百一十五員名馬二十餘匹協理劉之綸沒矣而充營附食者猶有四百九十七員名馬三十二匹他如匠役之幫貼護餉之家丁及各將官之薪水雜流爲數俱浮所當亟爲裁定而不可聽其虛冒者也又查舊餉額兵旣減去一萬則月餉之支

給者似有贏餘乃每月費至二萬四百餘兩未見存剩細加查對如三屯左右等營兵有既支主餉又支客餉者如黃崖等處管兵有既支月餉而復支行糧者春防各軍有加支行糧或兩月或四月不等者不知創自何年而今遂踵襲無已也一營分列二冊俱載而將官之薪水月廩兩處重支矣如陣亡官兵補支糧餉者共計三百一十八員名陣亡馬匹補支草糧者共五百三十八匹大是異事又撫院舊餉家丁四十

五名見支二年十一月之餉不知遵城已陷此輩原在何處而今又補支舊餉也灤陽營原食兵部餉銀每歲三千六百兩差官解送近乃改食戶部之餉而兵部具題欲遂以爲例矣三屯左營民兵工食銀一萬九千二百兩連閏二萬有奇原食薊鎮保河民兵銀兩近乃亦食戶部之餉殊非舊制如南兵三十六名俱自二年八月起至三年四月止一日而補支九月之餉恐不可爲訓也今以總督之冊與餉司冊勘對

在總督冊內新舊二項官軍兵丁共四萬五千九百四員名而餉司冊報乃四萬五千一百零三員名總督冊內較多八百一員名夫總督兵冊乃據兵道掛號之數而餉司冊乃據該司支餉之數宜同而不同者何也及查冊內掛號與支糧月分亦多不同毋亦兵馬有消長而造冊有先後遂致五異乎然就中冒濫虛浮者恐不少矣總之邇來兵驕將悍了無限制纔一劄委卽儼然列營而邊徼冒濫且呼朋引類共糜公帑而安辦能否餉司徒鑒於前車未敢堅執兵道祇習乎故套未肯清核在督臣按籍查點某爲主兵某爲客兵共有此數不知還按以支餉之則久已化舊兵而胥爲新兵矣夫薊之今日非無事之時也方在奉

旨召募而現在之新兵何嫌溢額酌時勢而變通之大加整頓以求清楚則主客之名新舊之額正似不必拘拘也說者謂宜就餉之厚薄分兵之戰守或騎或步另立管制以食一兩五錢者立

爲戰兵至舊伍之中如選鋒健丁素食雙糧者亦隨之以上半年食七錢五分下半年食四錢五分者斟酌裒益分爲守兵其城操軍伴薪水等役仍照常規俾奸頑者不得支吾影射而懼者亦知引分自安卽撫院兵道標下親丁當有限制不妨節其有餘另立營伍以備衝鋒而於營伍瑣屑者歸併之頭目太多者裁抑之各定爲畫一經制今後各營領餉文冊凡營名有更張兵數有多寡不遵依經制者卽正以虛冒

之罪其又復何詞也又查臣部每月發新舊餉銀十五萬今據所報過者共止一十二萬四千九十七兩零雖本月分尚未盡領然新舊各兵所補支者亦頗相當惟援兵未支者尚在萬金外耳通計所用亦只十四萬以內而每月必索十五萬者不過爲找補舊欠之地耳乃舊欠原未清楚則又居然邊鎮一大漏卮也今查餉司造冊業已遵照簡明格式惟是營制混亂難稱畫一之規伏乞

度支奏請
勅下督撫衙門蚤定經制新舊有一成之額支放有不涸之法俾臣部按籍查核永杜虛糜萬不容遲延者也臣等曷勝翹跼待

命之至崇禎三年十月二十日具題本月二十三日奉聖旨據奏薊鎮營制參錯餉數混淆非亟清釐曷杜影冒著該督撫嚴加稽核畫定經制務令按冊了然以後依期給餉本內每月發銀十五萬兩該鎮額需不及此數歷來有餘的作何歸著還著餉司明白奏來欽此

覆秦滇二省鼓鑄充餉疏

題爲秦局鑄息雖微目前措餉攸賴謹酌議上請以祈

聖斷事專理新餉山東清吏司案呈崇禎三年五月十五日奉本部送戶科抄出陝西巡撫劉廣生題前事等因本年五月十一日奉

聖旨該部知道欽此又該雲南巡撫王位奏爲遵

旨回奏事等因本年八月二十五日奉

聖旨據奏滇俗錢肥兼用官民兩便且無販鑄私弊

正可總攬利權坐收贏息該部一併酌議具奏欽此欽遵通抄到部送司案呈到部該臣等看得原議開鑄省分止有陝西湖廣雲南四川四省或銅斤出產或上下通行稱便今陝西撫臣劉廣生果稱一歲之息可得六七千金以接濟兵餉而民更出入便之矣雲南撫臣王伉又云錢肥兼用雖錢息稍減而用者欣然矣當此軍餉匱乏之時司計愁嘆之日而兩省之民俗如此縱出息不多涓滴之入皆堪補濟何憚而不令之亟行哉相應聽彼隨宜鼓鑄因勢利導通公禁私苟可以生不中制也至其所得之息應期速解以充新餉毋以利微而坐俟積厚以緩發則尤望於急公憂

國之撫臣矣伏乞

勅下臣部移文陝西雲南俾如議開鑄遵奉施行

崇禎三年十月十九日具

題本月二十六日奉

聖旨據奏陝西雲南鼓鑄稱便着該撫按設法飭行

錢息按期解充新餉該衙門知道欽此

覆登撫議調遼兵移餉疏

題爲申明兵馬錢糧數目速懇撥發專理新餉
山東清吏司案呈崇禎三年十月初四日奉本
部送戶科抄出登萊巡撫孫元化奏前事議調
遼兵移遼餉緣繇崇禎三年十月初二日奉

聖旨這奏明白剴切孫元化實心任事與近來邊臣
漫請難應藉口卸責的不同着查照疏內所請馬
價軍需月餉應內外分解的速與給發其兵馬額
數增除官員照品支俸俱如議行該部知道欽此

欽遵抄出到部又准兵部亦爲前事俱送司議
覆聞又奉本部送戶科抄出遼東巡撫丘禾嘉
題爲遵

旨抵補關寧缺額新舊兩便以垂經久事崇禎三年
十月十一日奉

聖旨這關寧抵補兵額及開支糧餉事宜着戶兵二
部酌議速覆欽此欽遵抄出到部又准兵部咨亦
爲前事俱送司相應并覆案呈到部該臣等看
得金復海蓋係三韓之南境

中國之故土漸次進取委不容緩撫臣孫元化力
任恢復故欲調遼兵以恢遼土移遼餉以餉遼
兵蓋以素統之將而用素習之兵則有臂使之
易以額內之兵而食額內之餉則無肘露之虞
甚便計也第遼兵雖云調登必須遼冊除名未
不募補而後可今遼撫丘禾嘉又欲以原題東
江王弘化歸兵一千五百名頂補登撫所調黃
龍步兵一千四百之數尚欠一百名糧復以登
撫所帶寧遠步中營六百名內以一百名補之

則與登撫所謂除遼冊以入登冊者全不相照
矣夫登撫所請兵餉馬乾銀七萬一千九十五
兩五錢召買米豆價銀一萬六千九百八十七
兩六錢八分爲數固不貲也臣部止此額餉應
遼則不能應登顧登則不能顧遼安能東西並
畫左右兩顧此必不可得之數矣及查遼撫恭
報到任一疏稱兵缺二萬有奇則缺伍甚多何
不以弘化之兵頂別營缺伍而必欲頂黃龍之
兵耶如欲必頂黃龍之額則遼餉必不能截登
餉必不能給將欲扣東江之餉以給弘化則厚
薄不同且前次奉有不必東江扣抵之

旨將欲臣部另給則臣部與兵部前已酌定登鎮增
兵二千增餉四萬亦已智盡能索無能復爲無
米之炊矣臣部職在供億各鎮不得不瞻彼顧
此以爲經久之圖合無移文兵部閣部與遼登
二撫和衷商確如果登撫所調之兵不必再爲
募補而以弘化之兵抵補別營缺額則可截遼
餉以餉登師否則卽當以黃龍之兵筭入登鎮

新兵二千之數卽食新增四萬之餉不亦可乎
雖額餉厚薄稍異但關寧地處窮荒物物仰給
內地官之廩俸與兵之月餉其優厚宜矣若登
州地居腹裏百物皆賤比之關寧所給似宜稍
加裁抑若或槩無分別雖欲以鼓敵懷之氣但
恐別管援以爲例濫觴何止或照津門則例查
給方得稱物之宜登撫經

國苦心不減臣等無妨再一商確非敢以此而掣
登撫之肘也至於貼防冷口黔兵一千二百二
十四員名據哀關內之空額以抵補似屬簡便
但奏補登撫所調寧遠步中營五百之數是卽
以王弘化抵補黃龍之意仍應總聽兵部閣部
會同二撫酌妥

奏報請自

聖裁而後可奉以從事也其疏稱黔兵歷過月日不
知作何補給蓋指從前赴援之餉而言耳臣部
行糧鹽菜已經前在永鎮照例支給而應補月
糧例該黔省找給無容再議或以道遠難待不

度支奏請
妨查明歷過起止照其坐糧數目計日借給應
聽寧前餉司權宜代發冊報臣部移文黔省補
解者也既經登遼二撫臣奏題前來相應覆
請恭候

命下臣部移文兵部閣部并各該巡撫遵奉施行

崇禎二年十月二十三日具題二十六日奉

聖旨據奏登鎮調兵原資遼餉今關寧議補前缺一
餉不能兩顧作何通融着移會樞輔行該撫參酌
妥確具奏餘已有旨了欽此

覆通鎮督臣募兵支剩銀兩疏

題爲恭報募兵用過錢糧并陳存剩數目以祈

聖裁事專理新餉山東清吏司案呈崇禎三年九月
二十一日奉本部送戶科抄出督治通鎮兵部
左侍郎范景文題前事等因本年九月二十日
奉

聖旨戶部知道欽此欽遵抄出到部送司相應覈覆

案呈到部該臣等看得通鎮督臣范景文奉

命募兵五千因鎮臣楊國棟原募過三千而止募二

千又因舊有家丁一千而止募一千乃一千之中酌量給發安家衣裳或二兩或五兩或八兩所費僅三千四百四十二兩原領二萬兩尚餘一萬六千五百五十八兩奏請

明肯定奪夫當此搶攘危迫之秋而募驍雄敢戰之士無漏卮無濫觴已足昭清白矣况又捐已資以享士節

公帑以還官旣不以吝惜短豪傑之氣又不以過溢啓耗蠹之門此其義膽忠肝幽獨自矢真所稱

國爾忘家公爾忘私者也除前項餘剩銀兩應作該鎮月餉支用銷算外如督臣范景文者所當褒獎優異風勵群工者也旣經具題前來相應覆

請恭候

命下臣部移文督臣弁圻運廳遵奉施行

崇禎三年十月二十三日具

題本月二十六日奉

聖旨范景文捐貲急公知道了募兵餘剩銀兩卽作
該鎮月餉支銷如議行欽此

題覆楚餉買銅濟鑄疏

題爲遵

旨回奏事專理新餉山東清吏司案呈崇禎三年九
月二十八日奉本部送戶科抄出本部左侍郎
康新民題前事等因本年九月二十五日奉

聖旨這鑄本動支楚餉五萬兩如議行其設法買解
還酌計妥便不必差官更滋煩擾該部知道欽此
欽遵抄出到部送司相應具覆案呈到部該臣
等看得鼓鑄之役原爲生息佐餉而設顧有本

始有利本厚則利饒此自然之理也然必買解
得法而後鼓鑄不停鼓鑄不停而後生息可繼
耳昨臣同官左侍郎康新民

奏繳本息一疏目擊時艱備陳始末念銅本之不
充苦獲息之不厚汲汲焉以增本專官爲

請奉有

明旨准動省直應解錢糧差官買解及議動楚中原
借藩工舊餉并黔中撥回新餉各二萬五千兩
共五萬兩專差司官買解續奉設法買解還酌
計妥便不必差官更滋煩擾之

旨是則

聖明灼見利弊注念節省

弘猷睿慮誠非臣等庸愚所可及也臣等仰遵

明命敢不再酌長便而滌去紛擾哉案查寶泉局自
天啓元年開鑄以來所用銅鉛始則行令省直
動支輕齎等銀招商買解而無奈徒飽奸商之
腹如浙江之王烈光等湖廣之聶義等應天之
高紹隆等侵騙多銀至今茫無歸着迨天啓五

年特設南京銅差司官一員專董其事近年買解得法頗稱清楚然亦不無一二未完如何天儀等雖云爲數無幾亦非全利而無害也今奉明旨既不差官以滋擾自當設法以鼎新將仍委商役乎則前車之覆轍可鑒將併責銅差乎則長鞭之馬腹難及再四籌維合無責成湖廣撫按藩司選委賢能素有聲望府佐一員就便領銀前往荊州聚銅處所多方收買慎無假手奸商致生耗蠹仍先具職名報部以便稽考買完之日分爲二運添委協理州縣佐貳一員先行押解一半齎來而府佐督催未運以隨其後定限明年春盡夏初通完其腳價等費除五萬錢糧解京例需費用若干照常并發以供運銅之資

有不足者再於五萬內取給銷筭但當曲爲節省不得從中冒破果能依限完公正協二官俱行題叙紀錄如怠玩遲欠者輕則罰治重則降處庶商無乾沒之虞而局收鑄息之利矣恭候命下臣部移文各該衙門遵奉施行

崇禎三年十月二十三日具

題本月二十六日奉

聖旨這鼓鑄事宜年來領價買銅一任奸商耗蠹事後徒煩追比法紀何存今楚省產銅處所着該撫按司道擇任廉能府佐專管收買不許仍用商委以滋弊端選差州縣佐貳分爲兩運解京限明年四月以前到京通完其腳價等費依議銷筭果能遵限急公一體紀錄如怠玩逋欠該部科指名叅處該衙門知道欽此

摘催過限前後欠銅事件疏

題爲摘催過限欠銅事件以完公帑以資鼓鑄事
專理新餉山東清吏司案呈崇禎三年九月初八日奉本部送戶科抄出該本部題爲奉

旨奏報事本年九月初五日奉

聖旨奏報原爲責成若仍舊延諉奏報何益疏內如奸商欠銅蠹餉等項屢經題叅改限竟若罔聞又如方大任錢士貴所叅冒支糧料積弊奉旨查究關係最切且事在近鎮何難督催經年未見回奏

誨蠹養奸莫此爲甚該部科還單摘數件勒限嚴
稽如再玩違重治示警不得混入多款但應故事
欽此欽遵除冒支糧料一案業據關內道招詳
覆覈題駁又薊門奸商蠹餉一件於摘舉八月
過限事件疏內具題外所有欠銅事件已過九
月之限相應分別摘叅今查崇禎二年四月內
該錢法侍郎曹珍題爲猾商侵騙日久等事奉
聖旨奸商積欠銅鉛已有旨限三月內完解如何至
今不到便着應天浙江撫按衙門將原領商人委
官王來詔等速行提究務查欠銀着落據實回奏
再仍延緩責有所歸南京銅本着該司官作速完
解其節年給欠銀數一并查明具奏該部知道欽
此二年九月內又該本部題爲猾商侵騙日久
等事奉

聖旨聶義着湖廣巡撫遵限提追具奏不得遲延欽
此崇禎三年正月內又該本部錢法右侍郎康
新民題爲奸商侵騙等事奉

聖旨據奏銅商拖欠數多屢旨逾限好生違玩着省

直撫按卽於各官名下嚴追抵補如撫按違玩一併治罪代進銅本南部照數補還銅差商委經管司官追解都立限與他部商該部嚴比該衙門知道欽此正月內又該南部銅差主事畢生輝題爲猾商兩經題叅等事奉

聖旨這追完商逋銅鉛速解交局銀兩另擇幹商帶辦完日彙解未完的照限嚴追該部知道欽此本年二月內又該錢法侍郎康新民題爲奸商藐抗違限等事奉

聖旨這奸商馬惟異等未完銅鉛支吾在途總屬違限着行應天府嚴查儻解再延重究欽此本年三月內又該南京戶部鄭三俊題爲猾商兩經題叅等事奉

聖旨南商逋欠銅價未完的照數嚴追已完的補足庫貯一併速解季進銅本照舊例行不准免該部知道欽此本年五月內又該錢法右侍郎康新民題爲奸商侵騙日久等事奉

聖旨這解比奸商王烈光并曹策等招詞影響隔遠

難憑仍復發回何時結局着將供吐各詞咨行該
撫按嚴提家屬逐一究查果有着落方准押回追
抵該部知道欽此欽遵通行在案查以上欠銅前
件共七疏其間商委姓名完欠數目總不出於
錢法督臣康新民所叅奸商侵騙一疏中也謹
按前後原疏細加查對內除王來詔許陞阮顧
行汪廣吳隆王爵韓應魁劉嘉惠沈文王誠馬
惟異所欠銅鉛銀兩陸續完解外其未完各商
在浙江省則王烈光等係天啓六年三月內領
輕齎銀一萬一千八百八十兩全未完曹策金
廷吳國賢係天啓四年九月內共在布政司領
輕齎銀二萬八千六十九兩三錢五分除完過
外原欠一萬二千六十九兩三錢五分內曹策
續完銀一十兩四錢二分五釐尚共未完銀二
萬二千五十八兩九錢二分五釐今王烈光金
璞成洪瑞關鳳曹策吳國賢男吳文魁提解到
京該錢法侍郎康新民題奉
欽依行查本省有無產業可以變賣完官其各犯見

在寶泉局追比在湖廣省則聶義原欠銀五千
八百九十五兩六錢八分零已完銀三千一百
八十五兩五錢七分尚未完銀二千七百一十
兩一錢一分今本商拘提到京見在寶泉局追
比汪有成原欠銀三千八十一兩六錢八分一
釐已完四百七十六兩六錢四分八釐七毫未
完銀二千六百五兩四分二釐三毫在南京銅
差則商人何天儀原欠銀六百一十兩九分一
釐全未完康太運原欠銀九百五兩六分全未
完章元德原欠銀一千七百二十三兩四錢一
分已完二百六十兩尚未完一千四百六十三
兩四錢一分金守憲原欠銀一千二百二十兩
五分全未完應天府商人石疇高紹隆原欠銀
八千六百三十五兩六錢八分已完六千一百
七兩三錢五分未完二千六百一十八兩三錢
三分謝承恩係天啓六年六月內領輕齎銀六
千兩已完三千一百七十八兩六分尚未完二
千八百二十一兩三錢四分在寶泉局則爐頭

陳謙金啓楊順修係天啓七年內兌領河南雜
項銀二萬二千兩除完過外原欠銀五千二百
八十八兩六錢全未完陳明道劉寧之係天啓
七年內兌領河南舊餉銀二萬兩除完過外原
欠銀四千二十六兩五分七釐七毫續完銀一
百二十兩七分六毫尚未完三千九百五兩九
錢八分七釐一毫又南部自差商人常楫王秀
原領銀一萬二千五百五十兩按南部鄭三俊
疏內稱二犯已經監故比追家屬完過銀三千
一百兩尚欠九千四百五十兩此各商積欠之
數也前件論過限則當摘叅經管論侵騙則當
叅處各商案呈到部該臣等看得古者鑄山以
爲利原非貿易於民間也至今日而已失其初
意矣果接濟以時輸納如額或可興息於十一
而不謂其拖欠之多也臣查南北省直商欠如
王烈光等其間多者以一二萬金卽少亦不下
千金在地方追比者方以倖免爲得計在提解
來京者又以囹圄爲福堂至法窮於無所施憫

不畏死真無容姑息養奸者矣業已屢違定限
例當摘叅查南商年久而欠多者如王烈光曹
策金廷吳國賢等一起寶泉局爐商年久而欠
多者如陳謙金啓楊順修陳明道劉寧之五名
侵騙獨多擔延最久雖云提到現在追比俟其
變產還官猶恐終無完期合無外行撫按衙門
內行錢法侍郎查其產業比其家屬設法追併
速完前件如俟年終不完卽行叅送法司務令
正身服罪庶奸猾知所畏憚而錢糧有所歸着
矣查年久而次欠者如湖廣之聶義汪有成應
天之石疇高紹隆謝承恩奸人巧於脫延臣部
屢催不應該省撫按司府得無視爲難完之局
而高閣置之乎定限年終追比如數完解倘再
逾期司府分別罰治本商叅送究追臣部萬難
再

請展限而以姑息養奸也其銅差商人何天儀康太
運章元德金守憲雖所欠不多然而積逋有年
豈容姑息所當責成該差郎中畢生輝亟提何

慶支奏請
天儀等家屬追究變產完官亦限年終盡數解
納如再稽延從重叅罰者也若常楫王秀人雖
監故但係南部自委應聽該部設法追補無使
少有拖欠可耳抑臣更有請焉此疏臣部統按
從前諸疏所開奸商姓名完欠數目業已備極
詳明以前七疏相應註銷今後督催

奏報一以此疏爲準庶前件歸一頭緒不紛而異
日摘叅更便

御覽矣既據該司案呈前來相應題

請恭候

命下臣部移文各該衙門遵奉速結施行

崇禎三年十月二十六日具

題本月二十八日奉

聖旨奸商拖欠銅價尚五六萬金內外延諉結局何
日各省責成該撫按兩京責成經營各官嚴比家
屬查核產業自認限期設法追補過限不完都着
自行回奏近日吏部題准立限期日如何未見遵
依還通行申飭前七疏姑准註銷該衙門知道欽

此

覆吳臺臣條陳兵餉疏

題為

天變示警修省宜殷乞因譴告圖實政以答

天心事專理新舊兩餉司案呈崇禎三年十月初三日

奉本部送戶科抄出江西道試監察御史吳履

中題前事等因本年十月初二日奉

聖旨本內鈐司餽囑先轉輒選等語著明白指奏兵
餉自有大經其裁扣優免工食原是你每言官條
議的如今又這等說着戶部酌覆飭法止求明允

原非一槩從重若法官果有在坐便當直糾以稱
朝廷欵恤至意朕加意求言樂聞盡謹亦不必因
灾方有敷陳該部院知道欵此欵遵抄出到部送
司所有裁扣優免相應具覆案呈到部該臣等
看得自有遼事以來

國家無日不用兵度支無日不策餉正供不足取
之加派加派不足取之捐助又取之優免工食
等項海內之物力已罄民間之膏血已窮而士
卒之嗷嗷猶是也臣部之皇皇猶是也傍觀者
徒聞其入不詳其出則以爲臣部有窟穴其中
如臺臣吳履中所致疑者而抑知其萬苦難支
乎據所稱歲入計一千四百六十餘萬而遼餉
之五百萬不與焉粵稽其數自

內供以至南北六部之貢稅誠或有之而非止臣
一部也如臣部之歲入鹽課共一百一十萬一
千四百八十六兩五錢二分一釐六毫京邊共
一百四十四萬六千九百餘兩自有定額而關
稅二十萬兩事例汰冗約十五萬兩皆取以佐

前項之不足總爲舊餉統約太倉所入僅二百九十餘萬而未有若是之夥也至於遼餉加派除蠲免并分撥黔餉與工部分餉外計銀三百八十七萬六千九百六十餘兩而遼米島餉俱於此中取給又雜項銀九十萬二千九百二十四兩九錢六分尚多未完在無事時百方節省數適相當以故無空缺之虞而今何如哉兵無處不增餉無人不加以至撫賞衣裝料豆草束諸費無在不益蓋視昔不啻什百而區區舊額烏能給之萬不得已採諸臣之條議復及捐助優免之類皆因軍興遞加奏入正額而尚不足以救然眉者近奉有開節大計之

明旨

聖謨弘遠舉從來缺額之故與目前窘迫之計無不在週迴洞悉中矣臺臣又謂不宜剝及生員優免皂隸工食委屢敦大之視可蘇海寓之困獨是禦侮捍患未有已時師行糧從難容緩計誰非王臣各懷公憤才智勇畧之士猶且請纓說

度支奏
劔身入戎行以報

君恩而暫捐銖兩以濟雪耻除克之餽當亦不以貴
賤貧富殊也况生員優免河南山東俱有先期
徵解如北直六府已報數萬有奇豈南北人情
頓有異乎是在有司設法催督以濟目前之急
已耳原題以三年爲始奴氛寧息卽行停止
皇上優士之仁諸生急公之義兼得之矣若夫抽扣
工食隸在雜項載入餉額肇自天啓元年會議
屢奉

明旨遵行已久又似無容寬免者也臣部爲兵餉計
嘔心瀝血百計支吾而猶然庫藏若洗正惴惴
憂譴謫之難逃使誠有千餘萬之歲輸臣部且
寬然有餘從容布之亦何苦而筭及青衿與庶
人在官者哉卽頃加派之議現奉

明旨叅以庭議老成謀

國者俱知其不可緩而臣部以議論紛紜尚難決
計顧舍此別無足餉之策容端疏具覆今未敢
再贅也旣經具題前來相應覆

請恭候

命下臣部行文各該衙門遵奉施行

崇禎三年十月二十六日具

題本月二十九日奉

聖旨這優免裁扣既經酌覆着遵照前旨行待邊餉
稍充題明停止疏稱事例汰冗每年約銀十五萬
如何兩項數只止此還查確奏來欽此

題請申飭西援關兵兼支行月疏

題爲入關援兵行月兼支懇乞

聖明申飭以信法守事專理新餉山東清吏司案呈
崇禎三年十月二十日奉本部送據薊州糧儲
主事蔣範化呈稱准統理南兵總兵謝尚政手
本案照關寧兵丁月支一兩八錢者止支銀一
兩四錢米五斗月支大糧二兩四錢者止支銀
二兩米五斗向在關寧銀米兼支自入援以來
各兵餉銀於薊鎮造領而月米則在關寧糧廳

照舊關支蓋以各兵家小尚在關寧故也自八月以來各兵家小俱接來遵化若仍往本處支米不惟各兵往返曠伍抑且本色難於輸輓矧查遵倉多收小米南兵食用不慣相應就近一併支銀實爲公私兩便煩爲查照等因又准協理忠義營副總兵鄒宗武手本爲懇恩比例討給月米事據本營家丁陳策等連名告稱策等奉募勤

王枕戈露宿攻克四城身冒矢石若不勝言且有調援關寧兵馬節月糧米俱已領給惟策等自正月起至今止月米升合未得俯念一視同仁雨露均霑前於七月內赴陞任曹副總兵告討已蒙馬總鎮移文請討蒙發米單支領間不期將單撤回懇乞軫念恢復之功血戰之苦移文會請蚤爲給發庶衆心悅服報効思奮等情到職據此爲照關寧調援兵馬月米俱已支領但本營兵丁乃係選募勤

王衝鋒破敵効有功蹟且役過月米嗷嗷告討相應

請給况此多事之秋激勵人心之時軍食軍餉
理正宜然合請俯念同仁希將役過月米賞給
各丁以鼓士氣等因准此查得防薊關兵所領
薊門者止塩菜行糧而月餉仍係關寧額數不
過代爲收放已耳月米一項原係關寧則例似
與薊門無與第支放錢糧惟憑掛號支冊今謝
總兵所討各兵八月分本色米折銀五百四十
一兩二錢係薊州道查明掛會而忠義營所討
各兵月米則係正月起至六月止計米三千七
百七石投過糧冊原各造有每兵支米五斗一
項而監軍吳御史已經掛給在冊一以室家在
關就便支領茲且搬運來遵始求改支一以往
來靡定尚未坐給茲且日久事平屢行懇討本
職以從前未支者補給於一旦嗣後應支者求
繼於將來爲數不貲其何以應乎乃各營咸謂
則例應得之物掛給已非一日靳而不予果何
爲者倘固爲拒絕恐觖望未平是又不可不深
長慮也除一面照數支給外伏乞本部軫念遠

戊饑兵所討月米原係關門成例其本色卽於
協濟津米數內通融銷算其折色仍於關兵餉
銀數外另爲補發庶各兵可以果腹而項款亦
得清楚矣等因到部奉批此非舊例大屬變體
查議具題送司相應具題申飭案呈到部該臣
等看得兵將列營有鎮駐防有地者制也出防
則支行糧塩菜而月餉銀米仍支於本鎮者亦
制也前者關兵援薊臣部因總兵馬世龍之請
其月餉銀兩暫就薊州支給不過憐其血戰稍

爲通融業已題明後不爲例蓋以防後來之濶
領以杜濫觴於萬一已耳至於月糧五斗既有
行糧四斗五升似應停支乃以各兵家口尚在
關寧姑與之以寬其內顧之憂不謂今在薊門
且並月米而一槩支給也查關兵之在薊者尚
有九千七十二員名今據總兵謝尚政所統一
旅業已移家室於遵城并關門八月分應支之
月糧竟就便支領復以粟米不堪折銀五百四
十一兩二錢又據副將鄒宗武下忠義營兵丁

陳策等支領關門應得月米自正月以至六月
共支三千七百七石矣夫餉司支放總以道號
爲準憑以在薊之援兵而代支關門之月糧道
臣豈不可諭之以理拒之以義輒乃曲徇移會
縱不嫌越俎獨不慮違制乎至於陳策等所支
月米據稱監軍道御史吳阿衡已先爲掛號該
司不敢不爲支給復查掛號冊內正二月各該
米四百七十二石卽以六箇月統算止該二千
八百三十二石按以所領之數則多八百七十

五石不支於從前而頓領於一日且數目多寡
不一亦不知其何說也夫兵馬有事則出防無
事則回鎮原不得任意爲往來旣移家於遵明
易駐防而爲經久已紀律所不載矣一兵也旣
支行糧四斗五升又支月糧五斗是一朝而行
月兼支雖曰爲彼所應得之物然在關有米而
不支在薊無米而多支殊臣所不解也况遵城
自軍興以來本色轉運召買最屬艱難買米一
石價值一兩二錢以上卽漕米輓輸陸運脚費

尚至四錢內外是本色顆粒升合之所存皆臣部殫心竭力之所得乃盈千盈百悉聽此輩溷支乎將無積貯日虛而狼戾可惜乎倘援薊援永之兵俱倣兩營成例尤而倣之恐薊遵有限之儲蓄不足以供無厭之索求也邇來兵驕將悍了無限制其易地兼支餉司不敢過而問焉溷支濫費長此安窮合請

天語申飭閣部督撫嚴諭二將鈐東各兵其在薊鎮支過月米卽作後來行糧銷算嗣後薊鎮止給行糧其月米仍赴關寧關支不許那移溷淆至忠義營所支米石與掛號冊數不投亦須查明有無冒領庶援兵不致徇尤而薊遵倉庾亦可少免於匱乏矣相應題

請恭候

命下臣部移文薊遼督撫遵奉施行

崇禎三年十月二十八日具

題十一月初一日奉

聖旨據奏援兵行月二糧分地關支原有成例今謝

尚政等兵兼支薊餉忠武營又多支米豆八百餘石經制不定涵淆無稽着行該督撫通行查覈支過月餉應否扣抵行糧并多支薊米有無虛冒逐一銷算庶杜濫觴但遵兵赴關領糧輓輸勞苦亦須軫恤其私可否改折并行酌議具奏欽此

題覆川貴總督分撥解黔楚餉疏

題爲黔餉已荷撥給懇乞

聖明勅部酌定起解郡縣併疏通鹽課以求實濟事
專理新餉山東清吏司案呈崇禎三年十月初五日奉本部送戶科抄出四川總督朱燮元題前事等因本年十月初四日奉

聖旨這酌定解黔楚餉并行鹽畫一事宜着該部確議覆行欽此欽遵抄出到部送司相應具覆案呈到部該臣等看得貴竹元竟窘蹙反側將平前

據餉院沈猶龍題將原欠未解黔餉分半解部
蓋謂奴犯

畿輔

王室多難故欲以原割遼餉仍還以餉遼也奉有楚
省解黔軍餉着撫按官通查欠數盡行清追以
半解黔以半解京之

旨續該撫臣洪如鍾查自天啓六年起至崇禎元年
止正雜南折屯餉等項共欠二十九萬九千九
百六十九兩有奇以一半解京二年應作舊欠

三年亦應分解而以武漢黃承德鄖襄長八府
解京其餘催解餉黔此楚撫復部之初議也繼
而督臣朱爕元有酌撥新餉之請臣部以黔餉
遼餉皆屬

王事且督臣持論甚平臣部何敢固執遂議撥楚蜀
二省原額協濟土府七萬四千餘兩新增兩淮
塩課銀六萬五千兩廣西遼餉二萬八千兩共
筭一十六萬七千餘兩又於楚中加派雜項內
共撥二十五萬二千餘兩以足督臣所請四十

二萬之數其餘加派三十一萬雜項六萬八千兩自崇禎三年爲始不論見徵壓徵勒令刻期解部以供軍興之用此本年六月內覆奉

欽依者也今據督臣以楚餉雖撥而未定起解郡縣不便催解疏稱湖南湖北所屬州縣加派雜項共計二十五萬有奇與臣部撥數相近欲使就便解黔其武漢黃承德荆岳鄖襄九府悉解臣部蓋以湖南湖北與黔接壤且隸黔撫節制之內易於催督故耳督臣持議公平相應如議

撥解以從其便其粵西遼餉并楚蜀協濟銀兩派撥已定相應一併行文催解濟黔不得拖延觀望致煩督臣之頻呼也其歷年舊逋與崇禎二年未完銀兩照依原議責令分半解京併將三年加派三十一萬雜項六萬八千兩責令分認府分作速起解如或再有推諉卽行照例叅處至於淮課之六萬五千原起於天啓六年因偏沅撫臣閔夢得有借益生息之請該前任尚書李起元遂議行淮益五萬引於黔省歲徵課

銀六萬五千以充黔餉不意義久未行至崇禎二年始得掣運而水商之奸者潛鬻於楚於是楚中屯鹽道蔣如奇有半鬻楚半鬻黔之議而鹽臣鄧啓隆又謂與其暗賣於楚不若明賣於楚因議改行楚中臣部覆令暫改楚中一年正督臣所謂行鹽濟餉苟利軍需不必強分畛域之謂也業已奉

旨准行其六萬五千之課鹽臣自必照數徵解無煩議擬矣嗣後鹽課臣部於黔鹽賣楚非法疏內奉有明是道遠難達徒長奸欺之

旨旋已覆

准停止鹽旣不行則課亦俱停况前議黔餉疏中以水西地多膏腴耕戰可以自給原議三年內盡撤楚粵之餉歸還臣部自四年起卽宜解還一十萬兩亦已覆奉

俞旨通行遵照在案似不必另爲設處矣惟是黔鹽之停原爲道遠難達今督臣疏稱各商紛紛願赴鹽已運到夫運到之鹽卽崇禎二年運掣而

道臣蔣如奇所議半賣於黔之塩也黔中素係
官塩絕跡之地果能以人力致之恐亦不宜盡
棄况黔餉後雖可已遼餉尚無底止合無行文
督臣備查運到黔塩果有若干該省果否可行
每年可銷若干務求實際毋托空談再與塩臣
商確具奏以聽

聖裁別議行止可也既經具題前來相應覆

請恭候

命下臣部行文川貴總督湖廣巡撫并各都察院轉

行湖廣巡按兩淮巡塩各御史及劄催餉京卿

唐暉遵奉施行

崇禎三年十月三十日具

題十一月初五日奉

這湖廣餉銀分別解黔解京府分如督臣議行
二年未完銀兩并歷年積逋俱着嚴催遵照原議
分半解京至淮引行黔已經停止如何又說各商
願赴今果運到若干及究竟何法妥便還着該督
與該撫按塩臣酌定畫一速奏不得屢議屢更致

度支奏
二
垂政體該衙門知道欽此

題叅解官稽遲不前疏

題爲軍餉萬分緊急解官任意稽遲謹分別查叅
以懲怠玩以速輸將事專理新舊兩餉司案呈
崇禎三年七月十一日該本部題前事等因七
月十三日奉

聖旨軍餉緊急解官那移作弊日久延捱左懋勛等
本當卽處旣錢糧未經交卸姑着戴罪依限解完
奏奪鄭道永該撫按究追具奏以後解銀就道方
許報聞經過驛遞詳註應付數目日期以憑核究

該衙門知道欽此欽遵通行遵照在案今查寧國
府冊報本年五月內差主簿許櫝解三年新舊
餉銀一萬七千三百九十八兩三錢係六月初
六日起程七月十八日到部廣東布政司冊報
本年三月十三日差官李洪謨解雜項銀二萬
七千九百五十二兩七錢係四月初三日起程
七月十五日到部又三月十九日差官沈之璞
解三年分舊餉銀三千三百一十六兩七錢係
四月初七日起程七月二十八日到部福建京
卿帥衆疏報本年初九日差興化府通判
儲元基解新餉銀八萬三千八百六十三兩五
錢係四月十八日起程七月十八日到部池州
府本年四月二十五日差典史趙守傑解舊餉
銀二千一百兩係五月初五日起程七月十五
日到部應天府冊報本年三月二十九日差江
寧縣縣丞左懋勛解新舊餉銀三萬七千九十
六兩係六月初九日起程七月十五日到部池
州府冊報本年二月二十日差銅陵縣典史許

登周解新舊餉銀一萬三千四十六兩八錢係
三月二十七日起程七月二十六日到部太平
府冊報本年四月三十日差當塗縣縣丞姚元
相解新舊餉銀二千九百四十五兩一錢係六
月二十五日起程七月二十八日到部浙江布
政司冊報本年四月內差斷事查錫策解加派
銀一萬七千七百五十四兩係五月二十四日
起程七月二十八日到部和州於天啓七年十
月二十日差役鄭道永張仲信解襍項銀五百

八十八兩今改差張崇海於三年七月初十日
起解八月二十八日到部鳳陽府冊報本年四
月二十八日差長淮衛經歷程一章解新舊餉
銀三萬六千二百八十七兩三錢係經歷張正
之代解又冊報二年十二月初四日差懷遠衛
經歷張正之解舊餉銀五千七百四十四兩七
錢係六月二十八日起程八月初五日到部五
月二十二日據催餉通政司右叅議沈應時冊
開據安慶府冊報見差宿松縣典史師一覽解

三年分舊餉銀二千六百六十兩至今未到
州府冊報本年三月二十一日差休寧縣主簿
何士奇解三年分舊餉銀一千七十六兩至今
尚未到部相應分別奏

奪案呈到部該臣等看得軍興孔棘供億殷繁所賴
外解接濟以救燃眉之急每患欠之民者追呼
不應豈容解之途者逗遛莫前耶昨臣部因解
官左懋勛等所解錢糧呈報多時遲延不到意
必各委有延捱那移等弊故特疏查叅以速其
至近者限半月遠者限一月俟錢糧到部交割
明白分別降罰以警將來奉有姑着戴罪依限
解完奏奪之

旨欽遵通行申飭在案今查廣東省解官李洪謨沈
之璞福建解官儲元基池州府解官趙守傑應
天府解官左懋勛寧國府解官許檣太平府解
官姚元相浙江解官查錫策鳳陽府解官張正
之池州府解官許登周以上各解官俱已如期
解部交割明白別無掛欠等弊及驗其水程多

係報解在先啓行在後情有可原似應寬假以
廣

皇仁者也惟是安慶府解官師一覽徽州府解官何
士竒所解舊餉半載未到違玩已極重究何詞
第恐該府原是空文預報銀未實發則罪不在
解官而在該府矣遽繩以法非政之平合乞

勅令撫按查其稽遲之故或係該府捏報或係本解
稽延務限十二月以內秉公查明連銀解報以
便分別罰治今後各省直起解錢糧務如

明旨所謂解銀就道方許報聞者而又酌道里遠近
定以到部限期違者查究正罪庶責任攸歸而
轉輸自速矣恭候

命下臣部移文各該衙門申飭遵奉施行

崇禎三年十月三十日具

題十一月初五日奉

聖旨據奏師一覽何士竒所解餉銀久未到部着行
該撫按嚴催速解并查遲悞是何根因延捱作弊
罪在解官空文預報罪在該府明白奏奪起解方

報前已有旨立限依議行李洪謨等既如期完納
免議欽此

再覆加派事宜疏

題爲兵餉孔棘措辦維艱再議量行加派事宜以
佐軍興事專理新餉山東清吏司案呈崇禎三
年九月二十五日奉本部送戶科抄出本部題
覆兵部尚書梁廷棟疏爲恭進九邊圖考乞
勅發戶部與臣部悉心講求以復

祖宗舊章事本年九月二十二日奉

聖旨錢糧加派一項該部曾有條陳朕實軫念民艱
未忍催徵太甚據奏人有恒產誼自急公不妨則

壤增科已與樞臣酌定但梁廷棟前疏意在懲貪清額國用自饒倘賦加而貪吏仍復誅求舊額依然混冒恐軍興無濟民困轉深慮始宜詳衆思當集還着與九卿科道公議妥確具奏本內采字錯寫改正行該衙門知道欽此又該禮科右給事中王猷等題爲目擊災異謹陳微赤仰乞

聖明採擇以祈

天永命事本年十月初五日奉

聖旨雷電示儆脩省宜虔嚴飭邊防屢有明旨援兵

久戍深可軫念著該督撫道將加意撫恤

上帝好生獄貴明允朕自有裁決加派恐累小民該部

條陳已付廷臣會議了該衙門知道欽此又該福

建道御史孫徵蘭題爲懇陳時務一得仰贊

中興萬全事本年十月十三日奉

聖旨這本說各衙門舉發弊端赦免前罪切實可行不必分等限年加派病民訓練成伍已有屢旨酌議申飭部屬陞授知府自當量才計俸其不勝任的兩計之外又可不時叅處不必預爲裁抑該部

各與覆行欽此欽遵通抄到部通送到司除事隸吏部者聽該部具覆外所有加派一欵相應具覆奏呈到部該臣等看得奴虜入犯軍興浩繁調募之役方新而未已本折之費愈用而愈多臣部千方百計搜括那移始猶借舊以補新而今且合新舊而俱困卽臣部前有條議不過削針頭之鉄刮佛面之金而卒非經久之道也

天語煌煌命臣部講求開節大端已

明鑒於瑣屑之無當矣臣數月以來日夜籌畫計今

日生財大端無踰加派一事最整最妥因補牘

上

請遵奉

明旨令臣再參庭議務求長便是生民之利病封疆之安危無日不週迴於

聖懷務期於兩便而後卽安臣部卽將原疏刊刻成帙遍送九卿科道兼以造膝面商凡老成謀

國者目覩邊圉之急臣部措餉之苦亦不復狃寬徭薄賦之常議臣復與臣同官及各司屬聚族

而謀殫心而議酌之時勢參之人情舍此更無
生財奇策計從前加派襍項共五百一十餘萬
祇以供關寧之用原未始有贏餘以待軍興也
頃自薊門有事既調援兵復募新兵如團練營
之列戍城外者所募兵下則以五千五十餘名
計通昌涿州又以一萬二千五百九十餘員名
計薊鎮見擬召募以三萬計而各營之改舊餉
而食新餉者又不可以枚舉矣卽以五萬而論
合之馬匹通計本折每年非得一百五十萬未

易供也又宣大秦晉川湖浙閩東省中州兩粵
滇黔之援兵無不畢集共以五萬四千有奇關
寧之兵入衛薊永者又以二萬餘計而秦良玉
之兵又將至矣是援兵以八萬餘計索本色又
索折色索行糧又索月糧甚則并索安家衣裝
等項是每歲又非百萬不可也各兵無一日不
待哺於臣督撫將帥無一處不責望於臣而臣
能以赤手空拳應乎臣能有天雨地湧神運鬼
輸之法不加賦而裕如者乎雖曰敲骨吸髓百

夫朕中禍在蕭牆俾悍卒得以抗我之短長奴
孽得以窺我之淺深凡我諸臣卽欲肝腦塗地
以報

皇上恐亦無救於緩急之數也夫薊遼者

京師之門戶也門戶固則堂奧重

京師者四方之腹心也腹心安則手足寧此不待
智者而知也當此民窮財盡之秋再議加派說
者懼閭閻之嗟怨虞黔首之生心自是長慮卻

顧至意惟是臣竊思之且如中人之家始有百

畝之田以每畝三釐計之纔該銀三錢耳豈謂

三錢而足以累人者乎至貧之民無田則無可

派矣次貧之民田不及百畝者則所派益少矣

惟富民田連阡陌則加派漸多鄉紳田跨州邑

則加派愈夥斯固取之而不見以爲厲賦之而

不至於致亂者也版籍具在勢豪難容其規避

賦額昭存猾胥莫遂其舞弊文不得已而取民此

自公普均平之法而又何疑乎蓋亦券以往事

如山左蓮妖之變蜀黔土司之變三秦流賊之變閩南海寇之變有一因加派而生者乎臣原疏照畝加派定爲三分之一取其輕重維均而先後畫一耳今據諸臣議單如樞部有謂照糧石之多寡爲哀益分地畝之肥瘠爲重輕隨地制宜不以一切之法行之者如太僕寺少卿宋師襄有謂不得已而加派須照銀數不可照畝數照畝數則肥瘠不分照銀數則肥瘠有定者如御史李日宣有謂地方之地去糧存者堪憐小民之丁倒戶絕者堪恤惟有清畝而可議加者臣反覆參繹諸臣之言極爲有見夫民間之糧以地畝起稅者也地有肥瘠之殊糧有多寡之異地之肥者其糧必重而糧之多者其家必溫按畝而加則肥者與瘠者同科矣按糧而加則輕者與重者異等矣明取鄉紳富民之有餘以供之

公家而貧戶窮丁不苦於措辦之難如有地方不願照糧而願照畝者須照昔年均夾黃冊所載

地之等則高下以定所派之數因地制宜不得以一切之法行之亦變通之微權也其各省直應加銀數自崇禎四年爲始臣前疏議各省直各照原額三分之一而各州縣亦照原額三分之一確有定數庶可免於紛更生成聚訟至一州一縣之中則論糧論畝各從其便期於派如其額而止蓋各省直田賦不同有分地爲上中下數等者亦有折筭歸一而計畝起科者誠不得膠鼓而刻求也若有疲瘠州縣查從前加派萬不能完者許該撫按明白具奏卽與據實豁減以昭

皇上軫恤之仁臣前疏已備言之矣或地方素稱豐腴偶有災傷要不得一槩陳請以滋擾瀕者也北直保河六府亦照臣前疏量復加派六釐以供召買之用又各省直開徵立爲薊餉名色榜示通衢曉諭小民俱聽百姓自己輸納不得輕差衙移下鄉不得重加火耗分釐違者以一當十以十當百繩以重典有司另收另解不得濶

入遼餉舊額之內仍委風力推官不時稽查俟
邊防嚴密虜警不聞卽將薊餉銀兩先行蠲免
與天下休息此臣所爲日夜望之者也夫事有
庭臣議之而未必敢任者亦有僉以爲可而不
敢議者總無人執其咎耳臣權衡於緩急之際
扼腕於職掌之間卽有叢怨於臣者苟有利於
封疆實心甘之而弗敢避也伏乞

聖明裁答頒布一體遵奉施行

崇禎三年十月二十七日具

題十一月初二日奉

聖旨朝廷權宜加派士民應自樂輸但賦額稍溢分
毫官吏侵貪倍蓰况照畝照糧任便又復隨地參
差頭緒一棼奸弊滋甚名雖哀多益寡勢恐疊派
苛徵旣該部與在廷諸臣會同商確事難終已還
着細加參酌畫定良規務使較然易遵官民兩便
兼議至幾年卽當停止仍將所有釐剔禁約事宜
一并先行各該撫按諮妥奏聞待朕頒諭曉示裨
裕餉恤民之意中外周知該衙門知道

厚
天
壽
言

下
三
三



